



ՊԱՇՏՈՆԱԿԱՆ ԸՆԴՈՒՆԵԼՈՒԹՅՈՒՆ ՆՈՐ ՏԱՐՎԱ ԱՌԹԻՎ Ի ՊԱՏԻՎ ՎԵՀԱՓԱՌ ՀԱՅՐԱՊԵՏԻ

Հունվարի 2-ին, հինգշաբթի, երեկոյան ժամը 8-ին, Հայկական ՍՍՌ Մինիստրների Սովետին առընթեր Հայ Եկեղեցու գործերի խորհրդի նախագահ պր. Ս. Գասպարյանը, ի պատիվ Վեհափառ Հայրապետի, Հայ Եկեղեցու գործերի խորհրդի անունից, նոր տարվա առթիվ Երևանում կազմակերպել էր պաշտոնական ընդունելություն:

Ընդունելության ժամանակ Վեհափառ Հայրապետին ընկերակցում էին գերաշնորհ Տ. Սահակ արքեպիսկոպոս Տ. Հովհաննիսյանը, Հոգևոր ճեմարանի վերատեսուչ գերաշնորհ Տ. Հայկազուն եպիսկոպոս Աբրահամյանը, փոխ-լուսարարապետ հոգեշնորհ Տ. Շղիշե վարդապետ Սարգսյանը, Հոգևոր ճեմարանի փոխ-տեսուչ հոգեշնորհ Տ. Մեսրոպ վարդապետ Անթարյանը, Արարատյան թեմի առաջնորդական փոխանորդ հոգեշնորհ Տ. Վահան վարդապետ Գալամդարյանը, Մայր Աթոռի տնտեսա-ֆինանսական կառավարչության պետ պր. Հ. Սեդգարյանը, Մայր Աթոռի դիվանապետ պր. Հ. Առաքելյանը, «Էջմիածին» ամսագրի խմբագիր պր. Ա. Հատիտյանը:

Հրավիրյալների թվում էին Երևանի քաղաքային Սովետի գործադիր կոմիտեի նախագահ պր. Գ. Փահլևանյանը, Հայ Եկեղեցու գործերի խորհրդի նախագահի տեղակալ պր. Ս. Հովհաննիսյանը, խորհրդի անդամ, պատ-

մական գիտությունների դոկտ.-պրոֆ. Բ. Առաքելյանը, Գերագույն Հոգևոր Խորհրդի անդամ պրոֆ.-դոկտ. Ա. Ղարիբյանը, Արտասահմանի հետ կուլտուրական կապի Հայկական ընկերության փոխ-նախագահ պր. Մ. Բարլոյանը, «Սովետական Հայաստան» ամսագրի խմբագիր պր. Պ. Սելյանը և այլ հրավիրյալներ:

Ամանորի սեղանների շուրջ ստեղծվում է ջերմ և սրտագին մթնոլորտ: Սեղանը ղեկավարում է Հայ Եկեղեցու գործերի խորհրդի նախագահ պր. Ս. Գասպարյանը: Առաջարկվում են սրտագին կենացներ՝ Հայրենի կառավարության է՛լ ավելի հզորության և հայ շինարար ժողովրդի պայծառ ապագայի, Ս. Էջմիածնի պայծառության և Վեհափառ Հայրապետի թանկագին կենաց արևշատության համար:

Ընդունելության ժամանակ խանդավառ, հուզիչ ու հայրենասիրական ջերմ խոսքեր են ասում Վեհափառ Հայրապետը, պր. Ս. Գասպարյանը, պր. Գ. Փահլևանյանը, պր. Ս. Հովհաննիսյանը, պրոֆ.-դոկտ. Բ. Առաքելյանը, պրոֆ.-դոկտ. Ա. Ղարիբյանը, պր. Պ. Սելյանը, պր. Հ. Սեդգարյանը, պր. Հ. Առաքելյանը և պր. Ա. Հատիտյանը:

Ընդունելությունն անցնում է խանդավառ ու սրտագին մթնոլորտում:

